

3/2/2026

AKASHVANI AIZAWL

2:30pm

REGIONAL NEWS

CM ON FC

Chief Minister Pu Lalduhoma chuan Finance Commission 16-na rawt dan angin sorkar laipui chuan kum 2026-27 budget a pharh niin a sawi.

Social media kaltlang a hemi chungchang a sawina-ah Chief Minister chuan FC 16-na-in Mizoram an rawn tlawh tuma Horizontal Devolution Criteria leh weightage atana Mizoram sorkar rawtna zaa sawmriat vel dawn chu a pawm tih a hmuh theih niin a sawi a. Horizontal Devolution-a Mizoram chan tur hi FC 15-na-ah za zela bial point 5 a nih laiin FC 16-na-ah chuan za zela bial point 564-ah an rawn tisang a ni a ti a. FC 16-na hun chhung, tangka kum 2026 leh 2031 inkara a Mizoramin central chhiah atanga a chanpual dawn tur chu a pung dawn tihna a ni, a ti. Mizoram chan tur zat pung ta hi a za zela chhutin lang tam lo mahse a sum hrawm a len avangin a sumfai ang chuan a tam tham viau ang, a ti bawk.

Kum tina Mizoram sum hmuh tur hi a hma aiin cheng vaibelchhe 1,500 velin a sang tawh zawk dawn ni a sawiin Finance Commission thil kalpui dan hmanga sum ruahmanna siam thenkhat SASCI leh a dangah te pawh Mizoram chanpual hi a tam phah thei dawn a ni, a ti a. Hmar chhak state zinga horizontal devolution share pung state tlemte zinga Mizoram a tel ve hi a lawmawm hle a ni, a ti bawk.

Hei bakah hian Village Council leh Local Council te tana ruahmanna hranpa Rural Local Body Grant leh Urban Local Body Grant te hi an titawp mai ang tih kha sorkarin a hlah avangin kalpui chhunzawm zel turin an ngen a. Sorkar ngenna ang takin hei pawh hi an awmtir zui ta zel niin a sawi. Finance Commission 16-na a Mizoram sorkarin rawtna a siamte chu an bawhzui nasa hle a, Mizoram an rawn tlawh lai a theihtawp chhuah a nih bakah an haw hnu-ah pawh Delhi lamah inkhawm an zuk huaihawtpui a ni a ti a.

FC 16-na hnena Mizoram sorkarin Memorandum thehluh tak, fel fai leh zahawm tak buatsaihtu Finance officials-te chungah lawmthu a sawi a. A bik takin Pu Lalhmingmawia, MFAS, Addl. Secretary, Finance Department leh a hote hian an hahpui zual a. An chungah lawmthu a sawi a ni.

<><><>

LESDE FEST

Labour Employment Skill Development and Entrepreneurship Minister Pu Lalnghinglova Hmar chuan, kar leh February ni 10 atanga ni 14 inkar a LESDE Kut buatsaih tur chu mahni kut kawih thiamna hmanga eizawngtute bakah, sorkar laipui leh Mizoram sorkar hnuai a agency te inkara remchanna siam sakna hun tangkai tak a nih a beisei thu a sawi.

He thu hi vawiina chanchinbumite a pisa-ah leng a sawmin, an hmaah a sawi a. LESDE Kut chuan tum tam tak a neih thu leh he'ng zingah hian Mizoram tualchhung a thil chi hrang hrang siamchhuahte chu a hralhna lamah huang a zauh pui ngei a beisei thu te, thalai hna la hmu mai lo thiam thil nei tha tak takte tan ram pawn lama hnathawh tur inkawhhmuhna hun a nih tur thu te a sawi a. Hei bakah hian State Level Special Vendor Development Programme an buatsaih tur thute, hemi atan hian National Highways & Infrastructure Corporation Limited (NHIDCL) bakah Power Grid Corporation, Indian Oil Corporation Limited, Food Corporation of India, North Eastern Eletrical Power Corporation Limited (NEEPCO) leh North East Frontier Railway (NFR) te an tel tur thu a sawi bawk.

Pu Lalnghinglova Hmar chuan Labour Kut lo awm tur pual hian MBOCWWB hnuai inziaklut te tan eizawna kailawn an tih mai skill training & entrepreneurship support bakah "rahbi chhertu" ti a a hming an vuah, a thlawna coaching inpekna hun chu hawn a nih tel tur thu a sawi bawk.

<><><>

MIZORAM FIRST

Mizoram First pawl chuan Aizawl khawpui Kulikawn atanga Zemabawk inkar a veng 24-ah an zirchianna atanga a lan danin an hriat theih chinah hnamdang dawr 122 a awm thu an sawi.

He thu hi vawiin khan Aizawl Press Club-ah chanchinbu mite hmaah Mizoram First pawlte hian an sawi a, heng dawr an tarlan tak zinga za a 76 point 2 mi 342 chu a nghaktu hnam dang an nih thu te, za a 34-te chu ILP neilo an nih bakah heng mite hi Assam leh Bihar atanga lo kal an tam ber thu an sawi a. Aizawl a hnam dang dawr an hriat zingah za a 39 point 3 te chauhvin GST an pek thu te, in sakna bungraw zawrhna bakah Mizoram nitin mamawh eichawp thil a hlawma pekchhuahna tam zawk chu hnam dang kutah a awm deuh vek tawh thu an sawi.

Mizoram First pawlte chuan ILP vil leh chhui zuina Real Time Visitor Traking te, Sumdawna Chhinchhiahna Digital Business Mapping bakah Chhiah Pek Vilna Automated Compliance-te chu neih a tul tawh hle tih an sawi a. Hnam dang huat vang leh thik vang ni lovin Mizo hnam a him theih zawkna atan hemi kawng a hmalatu tur ni a an hriat, Home Department, Information & Communication Technology, Tourism leh Taxation Department changtu Minister te bakah Chief Minister bualh pawh he thil hi an thlen tawh thu an sawi bawk.

<><><>

BEAR ATTACK

Kolasib district a Thingthelh khua ami Tv Lalrotluanga chu nimin khan a ram kalna-ah savawmin a seh avangin a hliam.

Tv.Lalrotluanga hi nimin chawhma dar 11 vel khan a ram kalna Builum lui kamah Savawm in a seh a. A hmai leh a taksa dangah hliam tuarin, Bukpui PHC-ah first aid pek a nih hnu-ah nizan khan riah tir a ni a. Tukin khan Durtlanga Synod Damdawi-in thlen pui a ni.

Tv Lalrotluanga hian a ram kalna ah hian mau a sat a, a inrin loh laiin Savawm hian rawn bei-in, hun engemawchen an in sual hnu-ah a fehpuite a au a, theihtawp chhuah in a insaseng hnu ah a naute a han fin thei a ni. A dinhmun a tha-in, a ngaihtuahawm lo ni a thu dawn a ni.

<><><>